

Na osnovu člana 12. stav 1. tačka c. i člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00 i 4/01), Skupština Kantona Sarajevo, na sjednici održanoj 30. augusta 2001. godine, donijela je

ZAKON

O SAMOSTALNIM UMJETNICIMA

I - OSNOVNE ODREDBE

Član 1.

Ovim zakonom uređuju se sticanje statusa samostalnih umjetnika, pojedina prava samostalnih umjetnika i druge mjere za podsticanje kulturnog i umjetničkog stvaralaštva na području Kantona Sarajevo (u daljem tekstu: Kanton).

Član 2.

Samostalni umjetnici u smislu ovog zakona su umjetnici koji ispunjavaju slijedeće uslove:

1. da nisu u radnom odnosu;
2. da im je umjetničko stvaralaštvo i djelovanje jedino zanimanje;
3. da im je svojstvo samostalnog umjetnika priznato na način i po postupku utvrđenom ovim zakonom;
4. da su državljani Bosne i Hercegovine koji imaju prebivalište na području Kantona.

Član 3.

Prema područjima umjetničkog stvaralaštva i djelovanja umjetnici se, zbog ostvarivanja zajedničkih interesa, mogu udruživati u umjetnička strukovna udruženja u skladu sa aktima udruženja.

Područja umjetničkog stvaralaštva su: književno, književno- -prevodilačko, pozorišno, filmsko, muzičko, muzičko-scensko, baletno, plesno, likovno i primijenjeno likovno (slikarsko, kiparsko, arhitektonsko) umjetničko oblikovanje, umjetnička fotografija, multimedijalno stvaralaštvo i sl.

II - STICANJE STATUSA I PRAVA SAMOSTALNIH UMJETNIKA

Član 4.

Kantonalni ministar nadležan za djelatnosti kulture (u daljem tekstu: Ministar) imenuje Stručnu komisiju kao konsultativno tijelo radi rješavanja o statusu i pravima samostalnih umjetnika, a na prijedlog umjetničkih udruženja sa sjedištem na području Kantona Sarajevo koja okupljaju samostalne umjetnike prema području djelatnosti iz člana 3. ovog zakona (u daljem tekstu: Stručna komisija).

Stalni sastav Stručne komisije čini jedan predstavnik kantonalnog ministarstva nadležnog za djelatnosti kulture (u daljem tekstu: Ministarstvo) i četiri istaknuta umjetnika, predstavnika različitih područja umjetnosti.

Za svako područje samostalnog umjetničkog djelovanja iz člana 3. ovog zakona imenuju se po četiri promjenljiva

člana Stručne komisije koji rade u ovoj komisiji kada su na dnevnom redu pitanja iz područja njihovog djelovanja.

Sredstva za rad Stručne komisije obezbjeđuju se u Budžetu Kantona Sarajevo.

Sastav i način rada Stručne komisije uređuje se bliže njenim poslovnikom.

Član 5.

Mandat članova Stručne komisije traje četiri godine, a članovi se mogu razriješiti i prije isteka mandata na vlastiti zahtjev, zbog odsustvovanja u trajanju dužem od tri mjeseca, bez obzira na razloge kao i zbog neurednog i neblagovremenog izvršavanja poslova iz nadležnosti Stručne komisije.

Član 6.

Umjetnik može podnijeti zahtjev Ministarstvu za sticanje statusa samostalnog umjetnika.

Podnosilac je obavezan da, uz zahtjev, priloži sljedeću dokumentaciju:

1. biografiju potvrđenu od strane matičnog udruženja;
2. kopije osvojenih priznanja i dodijeljenih nagrada za umjetničko stvaralaštvo;
3. mišljenje strukovnog udruženja;
4. kopiju lične karte i prijavnice;
5. potvrdu Zavoda za zapošljavanje da je nezaposlen ili kopiju radne knjižice.

Ministarstvo rješenjem utvrđuje status samostalnog umjetnika ili odbija zahtjev podnosioca, u skladu sa odredbama zakona kojim se uređuje upravni postupak.

Protiv rješenja iz prethodnog stava, a u roku od 15 dana od njegovog dostavljanja dozvoljena je žalba Ministru.

Rješenje Ministra je konačno u upravnom postupku i protiv njega se može voditi upravni spor kod nadležnog suda.

U postupku rješavanja po odredbama ovog člana odgovarajuće se primjenjuju odredbe zakona kojim se uređuje upravni postupak.

Član 7.

Bliže uslove za priznavanje statusa samostalnog umjetnika utvrđuje Ministar pravilnikom o kriterijima za priznavanje statusa samostalnih umjetnika, na usaglašen prijedlog postojećih udruženja koji okupljaju samostalne umjetnike.

Član 8.

Pod uslovima utvrđenim ovim zakonom samostalni umjetnik može podnijeti zahtjev Ministarstvu za priznavanje prava plaćanja doprinosa za penzijsko i invalidsko te zdravstveno osiguranje (u daljem tekstu: doprinosa) iz budžeta Kantona.

Zahtjev iz prethodnog stava obavezno sadrži: Ime i prezime podnosioca, adresu podnosioca, datum podnošenja zahtjeva, određeno područje umjetničkog stvaralaštva iz člana 3. ovog zakona i potpis podnosioca.

Podnosilac je obavezan da uz zahtjev priloži sljedeću dokumentaciju:

1. rješenje o priznatnom statusu samostalnog umjetnika;
2. ovjerenu Izjavu datu pod moralnom i materijalnom odgovornošću da je imenovani prijavio sve svoje prihode poreskoj upravi, te da nije ostvario veći prihod od prihoda utvrđenog u članu 10. ovog zakona;
3. poresko uvjerenje.

Član 9.

O zahtjevu iz prethodnog člana rješava Ministarstvo, a prema uslovima i na način propisan pravilnikom iz člana 11. ovog zakona.

Član 10.

Pravo na penzijsko i invalidsko te zdravstveno osiguranje ima umjetnik koji u prethodnoj kalendarskoj godini ostvari prihod manji od prosječne mjesečne neto plaće u Kantonu Sarajevo.

Član 11.

Pravilnik o uslovima i postupku priznavanja prava samostalnih umjetnika na uplatu doprinosa iz budžeta Kantona (u daljem tekstu: Pravilnik) donosi Ministar, na prijedlog postojećih umjetničkih udruženja koja okupljaju samostalne umjetnike sa područja Kantona.

III - DRUGA PRAVA SAMOSTALNIH UMJETNIKA

Član 12.

Kod odlaska u penziju, samostalnom umjetniku pripada pravo na isplatu tri prosječne neto plaće ostvarene u prethodnom mjesecu u Kantonu Sarajevo, iz budžeta Kantona.

IV - PRESTANAK STATUSA I MIROVANJE PRAVA SAMOSTALNIH UMJETNIKA

Član 13.

Prestanak statusa i prava na uplatu doprinosa nastupa:

na vlastiti zahtjev samostalnog umjetnika, na određeni rok ili trajno;

ako samostalni umjetnik zasnjuje radni odnos;

ako boravi u inostranstvu u trajanju dužem od šest mjeseci u kontinuitetu;

ako samostalni umjetnik ispunjava uslove za penziju;

ako samostalni umjetnik ode na redovan studij;

ako samostalni umjetnik ode na studijsko putovanje ili usavršavanje u inostranstvo u trajanju dužem od 18 mjeseci;

ako se u postupku revizije utvrdi da samostalni umjetnik ne ispunjava uslove u skladu sa kriterijima iz ovog zakona;

ako samostalni umjetnik bude pravosnažnom odlukom nadležnog suda upućen da izdrži kaznu zatvora u trajanju dužem od šest mjeseci.

Boravkom u inostranstvu, u trajanju dužem od šest mjeseci u kontinuitetu, smatra se boravak za koji je samostalni

umjetnik dobio dozvolu za produženje privremenog boravka ili za trajno nastanjenje, što se dokazuje potvrdom od strane odgovarajućeg predstavništva Bosne i Hercegovine u državi u kojoj samostalni umjetnik boravi.

Član 14.

Mirovanje statusa samostalnih umjetnika i prava na uplatu doprinosa nastupa:

ako samostalni umjetnik ode na službu vojne obaveze - do povratka;

ako je samostalni umjetnik izabran za funkcionera i imenovan od strane skupštine, odnosno drugih državnih, entitetskih, kantonalnih, gradskih ili općinskih organa ili tijela - do prestanka mandata;

ako samostalni umjetnik zasnuje radni odnos u trajanju od najduže jedne godine, do prestanka radnog odnosa, odnosno do isteka jedne godine;

ako samostalni umjetnik izdrži kaznu zatvora do šest mjeseci.

Član 15.

Samostalni umjetnik kojem je pravo na uplatu doprinosa mirovalo, za obnavljanje prava na uplatu doprinosa treba podnijeti zahtjev u roku od 15 dana od dana kada su prestali razlozi za mirovanje.

Ako samostalni umjetnik ne podnese zahtjev u roku iz prethodnog stava, Ministarstvo donosi rješenje o prestanku prava na uplatu doprinosa.

V - MJERE ZA PROVOĐENJE ZAKONA

Član 16.

Samostalni umjetnik briže se sa liste samostalnih umjetnika kojim se priznaje pravo na uplatu doprinosa iz člana 10. ovog zakona ako nepotpuno i netačno prikaže svoju materijalnu situaciju iz člana 8. stav 3. tačka 2. ovog zakona.

Član 17.

Rješenje o prestanku prava na uplatu doprinosa donosi Stručna komisija.

Član 18.

Stručna komisija će svake četiri godine po službenoj dužnosti izvršiti reviziju priznatih prava samostalnih umjetnika na uplatu doprinosa iz budžeta Kantona.

Član 19.

Umjetnik koji po odredbama ovog zakona ne ostvaruje pravo na uplatu doprinosa iz budžeta Kantona, ima pravo sam uplaćivati te doprinose.

Član 20.

Ministarstvo vodi registar samostalnih umjetnika.

Sadržaj i način vođenja registra iz stava 1. ovog člana propisuje Ministar.

VI - PRELAZNE I ZAVRŠNE ODREDBE

Član 21.

Ministar će donijeti pravilnike iz čl. 7., 11. i 20. ovog zakona u roku od mjesec dana od dana stupanja na snagu ovog zakona.

Član 22.

Ministarstvo će uspostaviti Registar samostalnih umjetnika u roku od 30 dana od dana donošenja pravilnika iz člana 20. ovog zakona.

Član 23.

Samostalni umjetnici kojima je do dana stupanja na snagu ovog zakona priznato pravo na uplatu doprinosa, zadržavaju to pravo do okončanja postupka prve redovne godišnje revizije.

O daljem ostvarivanju toga prava odlučit će se prema odredbama ovog zakona.

Član 24.

Samostalni umjetnici iz stava 1. prethodnog člana, ostvaruju prava iz čl. 10. i 12. ovog zakona počev od 01. 01. 2001. godine.

Član 25.

Danom stupanja na snagu ovog zakona, na području Kantona Sarajevo prestaje primjena Zakona o samostalnim umjetnicima ("Službeni list SRBiH", br. 3/78 i 26/82).

Član 26.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-265/01 30. augusta 2001. godine Sarajevo

Predsjedavajući Skupštine Kantona Sarajevo Miro Lazović, s. r.